

Newspaper	Berita Harian
Date	15 / 8 / 2017

Cara ASEAN jadi model terbaik: PM

BH-15/8/2017
Pg. 2



Najib bersama Ahmad Zahid, Anifah (tiga dari kanan) dan Timbalan Menteri Luar, Datuk Seri Reezal Merican Naina Merican (kiri) melihat replika setem ulang tahun Hari ASEAN Ke-50 tahun pada majlis sambutan Hari ASEAN anjuran Kementerian Luar di Suria KLCC, Kuala Lumpur, semalam.

➔ Kesepakatan galak pembangunan, kestabilan sosioekonomi serantau

Oleh **Nazura Ngah**
nazura_ngah@bh.com.my

► Kuala Lumpur

Datuk Seri Najib Razak berkata Cara ASEAN atau 'The ASEAN Way' yang berjaya membawa kestabilan dan kemakmuran di rantau ini berperanan sebagai model pembangunan terbaik untuk negara anggota dan negara sedang membangun.

Perdana Menteri berkata, model itu dilihat banyak pihak sebagai jauh lebih sesuai berbanding dilaksanakan pertubuhan serantau lain yang kini sedang berdepan masalah.

Beliau berkata, ASEAN kini diiktiraf sebagai penggerak utama dalam seni pembinaan dan pembentukan politik, keselamatan dan ekonomi serantau.

Katanya, menerusi dialog termasuk Forum Serantau ASEAN dan Sidang Kemuncak Asia Timur, ASEAN berjaya membawa kuasa dunia di meja rundingan bagi membincangkan isu semasa yang penting.

"ASEAN adalah peneraju dan penggerak Kerjasama Ekonomi Komprehensif Serantau yang bakal membawa peluang baharu kepada hampir separuh penduduk dunia, merangkumi 30 peratus Keluaran Dalam Negara Kasar (KDNK) global.

Kekal semangat setia kawan

"Pada masa sama, kita berjaya mengekalkan semangat setia kawan, membuat keputusan secara konsensus dan mengiktiraf kedaulatan setiap negara anggota. Kita bersatu dalam ASEAN tetapi kita tidak mencampuri hal ehwal dalaman negara jiran," katanya pada majlis sambutan Hari ASEAN anjuran Kementerian Luar di Suria KLCC, di sini semalam.

Perdana Menteri turut melancarkan setem memperingati Ulang Tahun ASEAN Ke-50. Yang hadir sama Timbalan Perdana Menteri, Datuk Seri Dr Ahmad Zahid Hamidi; Menteri Luar, Datuk Seri Anifah Aman serta Menteri Perdagangan Antarabangsa dan Industri, Datuk Seri Mustapa Mohamed.



ASEAN adalah peneraju dan penggerak Kerjasama Ekonomi Komprehensif Serantau yang bakal membawa peluang baharu kepada hampir separuh penduduk dunia, merangkumi 30 peratus Keluaran Dalam Negara Kasar (KDNK) global"

Najib Razak,
Perdana Menteri

ASEAN ditubuhkan pada 8 Ogos 1967 di Bangkok, Thailand. Malaysia bersama Indonesia, Filipina, Singapura dan Thailand bersama-sama mengasaskan pertubuhan yang kini turut dianggotai Brunei, Kemboja, Laos, Myanmar dan Vietnam.

Peristiwa penting

Najib juga menyifatkan sambutan ulang tahun ke-50 adalah peristiwa penting untuk dirinya secara peribadi kerana bapanya, Allahyarham Tun Abdul Razak Hussein yang ketika itu Timbalan Perdana Menteri adalah antara lima pengasas ASEAN yang menandatangani Deklarasi Bangkok.

Katanya, semua pihak perlu berusaha menjadikan ASEAN terus relevan dan nyata kepada rakyat termasuk meningkatkan kesedaran mengenai sejarah dan pencapaian pertubuhan serantau itu selain menerangkan perancangan untuk masa depan.

"Supaya suatu hari nanti kita berfikir bukan hanya sebagai rakyat Malaysia tetapi juga rakyat ASEAN," katanya.



ASEAN

- ekonomi ke-6 terbesar dunia dengan gabungan KDNK AS\$2.6 trilion (RM11.16 trilion)
- diunjurkan menjadi ekonomi ke-4 terbesar dunia menjelang 2050 dengan jangkaan mampu dicapai pada 2030
- 625 juta penduduk
- Malaysia menjadi Pengerusi ASEAN pada 2015